

PA: Komitê Skular
Di: Superitendenti Mary Skipper
DI: Atualizason di preparason pa regresu a aulas Anu letivu 2023-2024
DATA: kuarta-fera, 30 di agostu di 2023

A midida ki intuziasmu aumenta pa primeru dia di novu anu letivu di 2023-2024, ikipa di Skolas Publiku di Boston (BPS) sta ta trabadja duru pa prepara regresu di alunus, profesorís y funsionárius. Nha *Relatóriu di superitendenti* ta ben da menbrus un atualizason abranjenti sobri nos preparativus.

Kel memorandu li ta ben diskrebi prugresus signifíkativus ki nu fazi des di inísiu di anu letivu di 2022-2023, sobri kal nta ben papia tanbe na nha relatóriu. Nu sta na kondisons di kumesa anu letivu dretu. N'ta atxa ma ê inportanti fazi un atualizadon di pontu ki nu staba na anu pasadu y di pontu ki nu sta oji:

- Pesual
- Transporti
- Sirvisus di Alimentason
- Operasons y instalasons
- Akadémikus
- Involvementu Familiar y Kumunitáriu

Fazi prugresus - Undi nu staba anu pasadu y undi nu sta oji

Funsionárius - Kontratason di profesorís y funsionárius ausiliar

Nu sta na un puzison forti ku nos kontratason na inísiu di anu letivu. Na inísiu di **últimu anu letivu (2022)**, foi kontratadus **1,069 profesorís** ku 64 kandidaturas aprezentadus, u ki ta representa un **taxa di vaga di 5%**. **Atualmenti**, nu kontrata **1,419 profesorís** y un **taxa di vaga di 2.7%**.

Transporti

Pamo termus di nos novu kontratu ku nos fornecedor di transportis Transdev y a inkansavel sforsus di rekrutamentu di Dipartamentu di transporti di BPS, nu sta na un puzison sólidu pa kumesa anu letivu. Nos novu kontratu di sinku anu ku un furnecedor

di autokarus ta inklui insentivus finanserus signifkativus pa un midjor dizenpenhu y indiminizasons pur inkunprimentu ki sta ligadus a rezultadus orientadus pa alunus ki ka staba inkluidus na kontratus anterior.

Nu teni **743 kondutor ativu y 25 stajárius** ki sa ta prepara pa kumesa trabadja en brevi Nu ten tanbe **675 munitoris** di autokaru, ku mas **49 kontratasons pendentis** di autorizason di Gabinete di Kapital Umanu **di BPS** Na kontextu di nos novu kontratu, nu alarga furmason y akonpanhamentu di munitoris di autokarus pa apoia alunus ku difisiensia midjor.

Foi mandadu kartas di atribuison di transporti pa kureiu y e-mail pa tudu alunus, traduzidus pa língua maternus di famílias. Ikipa di Servisu di atendimentu a klienti di transportis sta tanbe totalmenti ikipadu ku un ikipa multilingi di kuazi 30 funsionarius di apoia a klienti, preparadus pa djuda alunus y famílias na kualker kestons, priokupasons ou dizafius relasionadus ku transportis. Si famílias tiver algun dúvida sobri atribuison di transporti di bu alunu, nhos podi kontakta Linha diretu di transporti di BPS através di número 617-635-9520 ou através di [Portal di apoia a transportis](#).

Na último anu letivu, nu reduzi konsideravelmenti número di viajens sen dadus di xegada (ou seja, "dadus GPS ki sa falta"). Na agostu pasadu (2022) faltaba dadus pa **19.1%** di viajens di autokarus programadus pa períudu di sedu y **21.6%** di viajens pa períudu di tardi. Na **junhu di 2023**, kel número li dixi pa so **3,6%** y **4,9%**, respetivamente.

N'sta intuziasmadu ku inplantason di serka di 20 autokarus skular ilétrikus, standu previstu intrega y entrada na sirkulason di mas di 18 otokarus ilétrikus duranti períudu di SY23-24. **É primeru bes ki BPS kumesa un anu letivu ku autokarus iletrikus na se frota.** BPS tanbe apresenta un kandidatura a programa di subsídus pa Autokarus skular linpus 2023 di Ajensia di Prutenson ambiental pa un másimu di 50 autokarus skular ilétrikus a mas.

Operasons y instalasons

Nu sabi ma alunus ten un midjor dizenpenhu kuandu ses nesesidadis ê satisfetus y nu sta inpenhadus na satisfazi kes nesesidadis li, ta furnesi refeisons saudável y instalasons konfortavel y akulhedoras des di primeru dia.

Apartir di 25/8, **86 skolas sta prontus pa kumesa kuzinha na primeru dia aulas.** Na inísiu di **anu letivu pasadu, so 67 skolas staba preparadu** pa kumesa kuzinha. Servisus di alimentason y nutrison di BPS ten 444 lugar prienxidus na kafetaria y 48 kontratasons na kursu, u ki ta ikivali a un **ifetivu di 492 algen.** Na **anu pasadu,** total era **473.**

Instalasons di BPS sa kontinua ta trabadja na sentidu di poi skolas mas linpus y konfortavel pa alunus y funksionárius. Es ikipa **78 skolas** ku mas di **3,800** aparelhus di ar kondisionadu (total di 108 skolas ku konfortu térmiku). **Na anu pasadu**, so **20 skolas** tinha un tatal di **916 unidades di AC**.

Kel veron li, instalasons di BPS kumesa obras di renovason total di kazas di banhu di 15 skolas. Au longu di prósimus kuartu mes, ta ben ser atualizadus 346 ikipamentus. Des di 2022, foi konklúidus prujetus di pintura na mas di 40 skolas. Des di inísiu di veron, 13 parkis di stasionamentu di skolas foi midjoradus, inkluidu repavimentason, pintura di linhas y substituison di basias di retenson, entri otus midjoras. Trabadjus tanbe ta inklui linpeza y ijienizason, pintura, midjoria di kazas di banhu y otus midjoras.

Akadémikus

Mas di 550 idukadoris di BPS partisipa (lideris skular, ikipas baziadus na skola) y 100 funksionárius di skritóriu sentral partisipa na Institutu di lideransa di agostu des anu na Madison Park Vocational Technical High School, di 15 a 17 di agostu. Seson foka na tenpu di trabadju rejional na apoiu a dizenvolvimentu di Planu skular di kualidadi (QSP), ben komu na implementason di nos novu mudelu di inkluzon na distritu interu.

Kel outonu li, tudu skolas di distritu ta ben lansa un Ikipa di planiamentu di inkluzon, ki ta ben ser dizenvolidu y apoiadu pa téknikus rejional pa garanti asesu a un instruson di Nível 1 forti y a servisus di mapiamentu a midida ki nu ta implementa inkluzon. Primeru anu di planiamentu duranti SY23-24 ta ben foka na implementason pa anus K0, K1, K2, 7 y 9, na implementa na SY24-25.

Involvimentu Familiar y Kumunitáriu

Na inísiu des semana, Min organiza runion virtual di kumunidadi #Back2BPS, undi nha ikipa apresenta infurmasons valiozus pa djuda famílias a prepara pa primeru dia di aulas. Mas di 800 famílias adiri konviti!

Linha di apoiu BPS sa kontinua ta reforsa ses kapasidadis, di manera a sta preparadu pa djuda famílias ku ses kestons na munti línguas. Spesialistas multilingis sta dispunível através di número 617-635-8873 ou via email helpline@bostonpublicschools.org.

Apartir di 28/8, 103 di 116 Family Liaisons baziadus na skola sta prontus pa da asesu a língua, akolhi iventus y apoiu paralén di akadémikus, y ta ben trabadja di pertu ku novi ikipas rejional na distritu interu. Sta atualmenti dispunível onzi vagas. Kuartu sentrus di Boas-vindas di BPS sta abertus y sta kontinua ta registra alunus. Inskrisons di veron

(julhu/agostu) Nu ten 2,124 novus alunus na un total di 50,552 matrikulas (na 28/8). Inskrisons final pa anu letivu di 2023-2024 ta ben sta dispunível a 1 di outubru y, komu ê abitu, nos númeru final di inskrisons na outubru ê frekuentimenti inferior a total di inskritus na inísiudi anu.

Anu ki sa ben:

A midida ki nu sa entra nes anu letivu, nu sta mas preparadus du ki nunka. Inda ten txeu trabadju pa fazi, ma nu ten sidu txeu intensional na stabelesi un bazi sólidu. Nu sabi ki, paralén di operasons di dia a dia, ten un trabadju stratéjiku mas vastu en ki tanbe nu debi konsentra. Paralen di involvimentu famíliar y di trabadju akadémiku ki sta en kursu, nkria partilha alguns di prinsipal árias operacional ki nu sta konsentradus pa prósimu anu:

Nos ikipa di **planiamentu di kapital di BPS** sta ta kria un rubrika ki ta ben sirbi di bazi a tomada di disizons sobri prujetus di instalasons. Kel prujetu li ta ben ser aprezentadu a Kunitê skular di Boston na setenbru. Verson atual di rubrika ta ben ser partilhadu ku públuku na dia 16 di setenbru, na un Kaza abertu, pa ki bu podi da bu feedback, ki ta ben ser inkorporadu na prujetu aprezentadu a Kunitê skular. Objektivu di rubrika ê difini pa kunitê y pa públuku forma modi ki nu sa plania toma disizons sobri futurus prujetus di instalasons skular. Alen di kel, nu ta ben konpleta mas dos mes di involvimentu di kumunidadi lukal antis di aprezenta rubrika Kunitê skular pa votason. Na final des anu, nu ta ben partilha Planu di instalasons a Longu prazu pa kria un previzibilidadi abranjenti pa obras nesesárius na instalasons, ta pirmiti ki famílias, alunus y funsionarius pa intendi futuru di ses kumunidadi.

Nos **Ikipa di milhoria sistémikus** ta ben kontinua ta trabadja na tudu organizason pa kria y inplementa sistemas duradurus na árias-txabi di SIP, ta garanti kunprimentu di prazus y akonpanhamentu di prugresus dipos di konkluzon di inplementason.

Ora ki épuka di kontratasons finda, nos **ikipa di kapital umanu** ta ben fazi un avaliason di ses sistemas atual. Distritu aumenta númeru di funsionárius na últimus anu y finda munti kontratus di negosiason kuletivu. Tudu keli ten un inpaktu na ikipa di OHC y na se kapasidadi. Ê un prioridadi kel anu li intendi kuze ki sta ta funsiona y ki otus apoius podi ser nesesárius pa ki nu podi sirbi mas di 11.000 funsionárius di Skolas Públuku di Boston.

Nos **ikipa di orsamentu y finansas** ta ben finda prujetu di finansiamentu skular reimajina y aprezenta un novu pruposta sobri forma modi ki nu ta finansia nos skolas. Nu ta ben avalia tanbe nos prusesus di akizison y nu ta ben rasionaliza senpri ki pusível y, pur últimu, nu ta ben analiza dispezas na tudu servisu sentral, a midida ki nu ta plania orsamentu di FY25 pa tranzita di ESSER.